

Capitulu 20

Induve ellu si scopre infine quale ellu era Tistù

Era ella chì l'occupava da parecchi ghjorni ; dumandava tutta a so attenzione ; ùn pensava più chè à ella. A chè ? À a scala.

– Tistù custruisce una scala ; li cambierà l'idee, dicianu cusì in Mirepoil.

Un si ne sapia di più. Una scala da pone induve ? Pè chì fà ? Perchè una scala è micca una torra o una casuccia* fiurita ?

Tistù era pocu precisu.

– Vogliu fà una scala. Puntu è basta.

Avia sceltu u postu, in pienu mezu à u pratu.

Di solitu, una scala, hè affare di bancalaru. Ma Tistù ùn si ghjuvava micca di legnu tagliatu.

Avia principiату piantendu i so ditoni in terra, belli prufondi, è quant'ellu lu pudia, scarrendu e bracce, l'avia alluntanati unu da l'altu.

* pavillon

– Ci vole chì e radiche di issa scala sianu sicure, disse Tistù à u cavallucciu chì, interressatu, seguitava i travaglii.

Dui arburi s'innalzonu, dui belli arburi rami strinti, à taglia slanciata. In menu d'una settimana, misuravanu trenta metri. Ogni mane Tistù, fidu à l'insignamenti di Mustaccione, li dicia duie parulle. Sta manera di fà dete belli risultati.

I dui arburi eranu d'una spezia scarsa ; u fustu tenia, distintu cum'è un piobbu d'Italia, ma incù a durezza di u tassu* è di u bussu. A fronda era denticata cum'è quella di u querciu, è i frutti criscianu arritti, cum'è picculi curnetti, cum'è pignotti di ghjallicu**.

Ma quandu chì l'arburi franconu i sessanta metri, e fronde denticate lascionu a so piazza à achi inturchinati, poi spuntonu bucciuli feltrati*** ciò chì fece di à Carolus chì st'arburi eranu d'una varietà cunnisciuta in lu so paese è chì si chjama u sorbu di l'acellaghji****.

* l'if

** sapin

*** bourgeons feutrés

**** le sorbier des oiseleurs

– Què ghjè sorbu ? mughjò a cucinara Amelia. Òn avete vistu chì avà crescenu caspe bianche è prufumate ? Sò accassia, à vi dicu. A sò bè eiu, chì, incù u fiore si ne face fritelle.

Ne Amelia, ne mancu Carolus avianu tortu o ragiò. Guardendu st'arburì, ognunu vidia a varietà chì li piacia u più. Eranu arburì senza nome.

Fecenu à mumentì più di centu metri d'altura è, i ghjorni di nebbia, e cime òn si vidianu più.

Ma, dicerete chì, ancu altissimi, dui arburì òn anu mai bastatu pè fà una scala.

Hè tandu ch'ellu s'affaccò u glicinu*, un glicinu di varietà scarsa, d'altronde, è cruciatu incù a lùppica**. Di più, offria issa particolarità di cresce à a perfezzione à l'urizontale frà i dui arburì. S'arrembava nantu à unu di i fusti, si lanciava, chjappava l'altru fustu, s'aghjumellava trè volte in giru, faccia un nodu incù u so stigliu***, cullava più in altu, è ripartia à l'arritrosa. Cusì si custruinu e marchjette – di a scala.

* la glycine

** houblon

*** tige

A meraviglia, fù quandu chì u glicinu, d'un colpu, si messe à fiurì. Un spiscione* malbu paria corre da u celu.

– Da veru, sì Mustaccione hè quassù, tale chì ognunu a mi ripete, disse Tistù à Gimnasticu, prufitarà di sicuru di issa scala per rifalà, ùn fussi chè una stonda.

U cavallucciu ùn rispose micca.

– Sò troppu tristu d'un vedelu più... è d'un micca sapè, disse Tistù.

A scala cuntinuvava à ingrandà. Omu a rittrattò per i ghjurnali stampati in culore, chì parlandune, scrissenu : A scala di fiori di Mirepoil hè l'ottesima meraviglia di u mondu.

S'omu avia dumandatu à i lettori qualesse eranu e sette prime, sarianu stati belli imbarazzati pè risponde. Punite puru a dumanda à i vostri parenti per vede !

Ma tuttu què ùn fece falà à Mustaccione.

« Aspettu torna trè matine, decise Tistù, è dopu saperaghju ciò chì ferma à fà. »

A terza matina s'affaccò.

* cataracte